



Borgarráð

Reykjavík, 9. júlí 2024

MIR24060010

Breyting á gjaldskrá sundstaða

Á fundi menningar-, íþrótt- og tómstundaráðs 28. júní 2024 var lögð fram svohljóðandi tillaga sviðsstjóra menningar- og íþróttasviðs:

Menningar-, íþrótt- og tómstundaráð leggur til við borgarráð að gjaldskrá sundlauga Reykjavíkurborgar verði breytt með það að meginmarkmiði að sækja tekjur af eldri ferðamönnum sem hingað til hafa notið gjaldfrjáls aðgengis að sundlaugum borgarinnar.

Tekið verði upp sérstakt árskort fyrir eldri borgara á verði sem jafngildi þremur stökum ferðum fullorðinna í sund eða kr. 4.000.- samkvæmt núverandi gjaldskrá. Gestir sem orðnir eru 67 ára og eldri greiði stakt gjald fullorðinna og gjaldflokkurinn eldri borgarar verði tekinn úr gjaldskránni. Öryrkjar fái áfram frían aðgang að sundlaugum borgarinnar gegn framvísun öryrkjakorts.

Breytingin taki gildi frá 1. ágúst 2024. Ný árskort fyrir eldri borgara taki gildi 1. október 2024, fram að þeim tíma geti eldri borgarar framvísað sundkortum sem nú eru í gildi.

Greinargerð fylgdi tillögunni.

Samþykkt með 5 atkvæðum Samfylkingar, Pírata, Viðreisnar og Vinstri grænna gegn 1 atkvæði Sjálfstæðisflokksins.

Jafnframt lagðar fram umsagnir öldrunarráðs dags. 24. júní 2024 og Félags eldri borgara í Reykjavík og nágrennis dags. 26. júní 2024 um gjaldskrá sundstaða.

Fulltrúar Samfylkingar, Pírata og Viðreisnar lögðu fram svohljóðandi bókun:

Sundlaugamenning hérlendis er einstök á heimsvísu. Góð aðsókn eldra fólks í sund hefur haft frábær lýðheilsuáhrif og þann árangur þarf að viðhalda. Að jafnaði eru ferðir í sundlaugar borgarinnar niðurgreiddar um helming en sundferðir 67 ára og eldri hafa verið niðurgreiddar að fullu. Ein afleiðing þess er að borgin verður af tugmilljóna tekjum árlega vegna ferðamanna 67 ára og eldri. Við teljum eðlilegt að breyta gjaldskránni svo eldri borgarar greiði í sund eins og aðrir aldurshópar, eins og víða tíðkast hérlendis og erlendis. Hins vegar er mikilvægt að koma til móts við þá eldri borgara sem sækja sund sér til heilsubótar allan ársins hring og er því lagt til að tekið verði upp árskort eldri borgara í sund á hóflegu verði eða kr. 4000 á ári, sem svarar til þriggja sundferða á fullu verði. Að auki teljum við rétt að auka stuðning við heilsueflingu eldri borgara í samráði við ÍBR og er stefnt að því að slík tillaga verði lögð fram í haust í tengslum við fjárhagsáætlun næsta árs.



Fulltrúar Sjálfstæðisflokksins lögðu fram svohljóðandi bókun:

Eldri borgarar hafa áratugum saman haft endurgjaldslausan aðgang að sundlaugum Reykjavíkur. Það fyrirkomulag var tekið upp að frumkvæði Sjálfstæðisflokksins en er nú afnumið af meirihluta Samfylkingar, Framsóknarflokks, Pírata og Viðreisnar. Félag eldri borgara í Reykjavík og nágrenni hefur mótmælt umræddri gjaldtöku harðlega og m.a. bent á að sundiðkun sé mikilvægt lýðheilsumál fyrir þennan aldurshóp. Fyrir marga sé hún að auki veigamikill þáttur við að rjúfa félagslega einangrun.

Virðingarfyllt,

Eiríkur Björn Björgvinsson,
sviðsstjóri.

Hjálagt:

Tillaga sviðsstjóra dags. 12. júní 2024

Umsögn öldungaráðs dags. 24. júní 2024

Umsögn Félags eldri borgara dags. 26. júní 2024.



Reykjavík



Viðtakandi: Menningar-, íþrótt- og tómstundaráð

Sendandi: Sviðsstjóri menningar- og íþróttsviðs

Reykjavík, 12. júní 2024

MIR24060010

TILLAGA

Breyting á gjaldskrá

Menningar-, íþrótt- og tómstundaráð leggur til við borgarráð að gjaldskrá sundlauga Reykjavíkurborgar verði breytt með það að meginmarkmiði að sækja tekjur af eldri ferðamönnum sem hingað til hafa notið gjaldfrjáls aðgengis að sundlaugum borgarinnar.

Tekið verði upp sérstakt árskort fyrir eldri borgara á verði sem jafngildi þremur stökum ferðum fullorðinna í sund eða kr. 4.000.- samkvæmt núverandi gjaldskrá. Gestir sem orðnir eru 67 ára og eldri greiði stakt gjald fullorðinna og gjaldflokkurinn eldri borgarar verði tekinn úr gjaldskránni. Öryrkjar fái áfram frían aðgang að sundlaugum borgarinnar gegn framvísun öryrkjakorts.

Breytingin taki gildi frá 1. ágúst 2024. Ný árskort fyrir eldri borgara taki gildi 1. október 2024, fram að þeim tíma geti eldri borgarar framvísað sundkortum sem nú eru í gildi.

Greinargerð;

Sund er mikilvæg heilsubót fyrir fólk á öllum aldri og mikill fjöldi gesta sækir átta sundlaugar Reykjavíkur á hverju ári. Mikill fjöldi eldra fólks sækir sundlaugar borgarinnar og nýtur þeirrar þjónustu sem þar er í boði. Mjög margir eldri borgarar eru fastagestir og sækja sundlaugarnar á hverjum degi stóran hluta ársins. Mikill fjöldi erlendra ferðamanna 67 ára og eldri sækir sundlaugar Reykjavíkur á hverju ári eða um 14.000 gestir. Reykjavíkurborg verður af verulegum tekjum vegna þessara gesta sem áætlað er að geta numið um kr. 18.500.000 á ári.

Eldri borgarar hafa fengið frían aðgang að sundlaugum borgarinnar svo lengi sem elstu menn muna og er mikilvægt að tryggja þessum hópi íbúa áfram gott aðgengi að laugunum. Meginmarkmið með þessari tillögu um að breyta gjaldskránni er að tryggja að eldri ferðamenn greiði fyrir aðgang að þessari mikilvægu þjónustu.

Samkvæmt álitni innviðaráðneytisins í máli nr. IRN22010877

(<https://www.stjornarradid.is/gogn/urskurdir-og-alit-/stakur-urskurdur/?newsid=f181fa9b-14f6-11ee-9bbb-005056bc4727&cname=%c3%81lit%c2%a0%c3%a1+svi%c3%b0i+sveitarstj%c3%b3rnarm%c3%a1a>)



Þá mega sveitarfélög ekki mismuna gestum eftir búsetu og því ekki hægt að veita einungis eldri Reykvíkingum frían aðgang að sundlaugum borgarinnar. Reykjavíkurborg hefur aftur á móti leyfi til að bjóða upp á með gjaldskrá mismunandi gjaldflokka og veita afsláttarkjör m.a. með útgáfu korta eins og árskorta.

Reykjavíkurborg greiðir nú þegar niður sundferðir allra gesta með núverandi gjaldskrá og samkvæmt henni greiðir Reykjavíkurborg að meðaltali kr. 1.200.- með hverjum gesti sem sækir sundlaugarnar eða um 50% af stöku gjaldi. Án innri leigu greiðir Reykjavíkurborg kr. 539 með hverjum gesti. Það er þó mismunandi eftir sundlaugum en þetta er reiknað meðaltal allra sundlauga borgarinnar.

Eldri borgarar hafa verið með frían aðgang að sundlaugum á höfuðborgarsvæðinu en eins og meðfylgjandi tafla frá 2024 ber með sér eru mörg dæmi þess í sveitarfélögum víða um land að þessi aldurshópur greiði fyrir aðgang í sund.

| 67 ára og eldri | Stakt gjald | 10 miðar | 30 miðar | Árskort | |
|-----------------|-------------|----------|----------|---------|-------------------------|
| Húsavík | 720 | 3.850 | | 24.850 | |
| Akureyri | 330 | | | 6.900 | |
| Dalvík | 450 | | | | |
| Fjallabyggð | 500 | 3.000 | 5.100 | 5.900 | |
| Árborg | 450 | 2.500 | 6.000 | 8.000 | |
| Múlaþing | 400 | | | | Frítt ef með lögheimili |
| Ísafjarðarbær | 1.330 | | | 4.450 | |
| Skagafjörður | 367 | | | | Frítt ef með lögheimili |
| Borgarbyggð | 390 | 2.640 | | 7.490 | |
| Suðurnesjabær | 490 | | | | Frítt ef með lögheimili |
| Reykjanesbær | 220 | | 4.150 | 15.000 | |
| Vestmannaeyjar | 1.050 | | 10.950 | 21.400 | Frítt ef með lögheimili |
| Akranes | 510 | | 5.250 | 15.760 | |
| Kópavogur | Frítt | | | | |
| Hafnarfjörður | Frítt | | | | |
| Garðabær | Frítt | | | | |
| Seltjarnarnes | Frítt | | | | |
| Ölfus | Frítt | | | | |
| Hveragerði | Frítt | | | | |
| Reykjavík | Frítt | | | | |

Vakin er athygli á því að mörg sveitarfélög eru með sérstakt gjald á eldri borgara og nokkur með sérstakt gjald fyrir eldri borgara viðkomandi sveitarfélags þrátt fyrir álit innviðaráðuneytisins í máli nr. IRN22010877. Þessi samanburður leiðir í ljós að þessi



tillaga um árgjald að fjárhæð 4.000.- fyrir eldri borgara í sundlaugum Reykjavíkur stenst vel samanburð við það sem best gerist í umræddum sveitarfélögum.

Með þessari tillögu reiknar menningar-, íþrótt- og tómstundaráð með að auka tekjur Reykjavíkurborgar um kr. 30.000.000. Samhliða þessari tillögu vinnur ráðið að því við gerð fjárhagsáætlunar fyrir árið 2025 að nýta hluta þessara tekna til að auka stuðning við heilsueflingu eldra fólks í íþróttafélögum borgarinnar, sem greiðist til Íþróttabandalags Reykjavíkur samkvæmt samningi og þannig til íþróttafélaga sem sinna heilsueflingu eldri borgara.

Þess má geta að menningar-, íþrótt- og tómstundaráð hefur með samþykkt borgarráðs skipað sérstakan stýrihóp til að fara yfir gjaldskrár stofnana menningar- og íþróttasviðs m.a. með það að markmiði að einfalda gjaldskrár og rýna möguleika á að auka tekjur borgarinnar. Hópurinn er nú að störfum og stefnir að því að skila af sér tillögum haustið 2024.

Menningar-, íþrótt- og tómstundaráð telur þessa tillögu best til þess fallna að tryggja eldri Reykvíkum ódýran aðgang að sundlaugum borgarinnar en jafnframt að erlendir ferðamenn greiði fyrir þessa mikilvægu þjónustu rétt eins og víða þekktist erlendis.

Virðingarfyllt,

Eiríkur Björn Björgvinsson,
sviðsstjóri.



Menningar- íþróttá- og tómsundaráð

Reykjavík, 24. júní 2024

MIR24060010

Umsögn öldungaráðs um tillögu sviðstjóra menningar- og íþróttasviðs varðandi breytingu á gjaldskrá sundlauga í Reykjavík

Á fundi öldungaráðs þann 20. júní 2024, var lagt fram bréf menningar- og íþróttasviðs dags. 14. júní 2024, með umsagnarbeiðni um tillögu sviðstjóra menningar- og íþróttasviðs varðandi breytingu á gjaldskrá sundlauga í Reykjavík. jafnframt var lögð fram og samþykkt meðfylgjandi umsögn öldungaráðs dags. 19. júní 2024.

Fulltrúar Félags eldri borgara í Reykjavík og nágrenni og Sjálfstæðisflokksins sátu hjá hjá við afgreiðslu málsins.

Fulltrúar Samfylkingar, Framsóknar og Heilsugæslunnar á höfuðborgarsvæðinu lögðu fram svohljóðandi bókun:

Fulltrúar Samfylkingar, Framsóknar og Heilsugæslunnar á höfuðborgarsvæðinu vilja þakka fyrir samtal og tækifærið til veita umsögn vegna gjaldtöku eldri borgara í sundlaugum borgarinnar. Markmiðið með gjaldtökunni er þrjúþætt, í fyrsta lagi að fylgja eftir álitum innanríkisráðuneytisins og hætta mismuna fólki eftir búsetu, í öðru lagi að ná í tekjur af erlendu ferðafólki 67 ára og eldri og að lokum afla tekna sem verður meðal annars notað í að efla heilsueflingu eldra fólks í borginni. Sú gjaldtaka sem fyrirhuguð er á ári í gegnum árskort, 4000 þúsund krónur jafnast á við þrjár stakar ferðir í sund, er hófleg að mati ráðsins og verður árskortinu ódýrast í Reykjavík miðað við sambærileg árskort annarra sveitafélaga. Vilja fulltrúar samt leggja áherslu á að mikilvægt er að fylgjast með mætingu eldra fólks í sundlaugarnar einmitt til hafa svigrúm til að bregðast við ef breytingar verða á aðsókn þessa hóps. Eftir atvikum finna lausnir og koma með mótvægisáðgerðir fyrir þá þau sem ekki hafa efni á árskortinu.

Fulltrúar Félags eldri borgara í Reykjavík og nágrenni lögðu fram svohljóðandi bókun:

Fulltrúar FEB, Félag eldri borgara í Reykjavík og nágrenni, í öldungaráði, mótmæla harðlega hugmyndum um að innheimta gjald af eldri borgurum í sundstöðum Reykjavíkurborgar. Sundiðkun er mikilvæg fyrir heilsu allra eldri borgara. Fyrir marga er hún að auki veigamikill þáttur í að rjúfa félagslega einangrun. Jafnframt er ef til vill ástæða til að minna borgaryfirvöld á að fjárhagur verulegs hóps eldri borgara er því miður þannig að þá munar um hverja krónu og sund er kannski eina líkamsræktin sem þeim bæði hentar og hafa haft efni á. Einnig er rík ástæða til að minna borgaryfirvöld á að eldri borgarar hafa þegar greitt fyrir uppbyggingu og rekstur umræddra sundstaða með útsvari sínu, fasteignagjöldum og fleiri álögum sem Reykjavíkurborg kys að leggja á íbúa sína. Þetta er brýnt lýðheilsuáttal.



Fulltrúi Sjálfstæðisflokksins lagði fram svohljóðandi bókun:

Æskilegt væri ef hægt væri að tryggja endurgjaldslausan aðgang 67 ára og eldri að sundstöðum borgarinnar. Fulltrúinn styður því þau sjónarmið sem fram koma í bókun fulltrúa Félags eldri borgara í Reykjavík og nágrenni. Á hinn bóginn telur hann einnig að framkomin tillaga menningar- íþróttar og tómstundaráðs sé reist á skynsamlegum forsendum. Mikilvægt er að sú tillaga sé útfærð þannig að komið sé sem mest til móts við hagsmuni þeirra sem lakast standa í samfélaginu og eru 67 ára og eldri.

Elísabet Pétursdóttir
Mannréttinda- og lýðræðisskrifstofa
Miðlæg stjórnsýsla

Hjálagt:

Umsögn öldungaráðs dags. 19. júní 2024

Bréf menningar- og íþróttasviðs dags. 14. júní 2024

Sæl Helga

Stjórn FEB tók erindið sem barst félaginu þann 14. júní s.l. frá Menningar-, íþrótt- og tómstundaráði Reykjavíkurborgar, fyrir á stjórnarfundum FEB í gær 25. júní og fylgir eftirfarandi bókun sem svar við því erindi:

- **Umsögn, breyting á gjaldskrá sundlauga í Reykjavík**

FEB barst erindi frá Menningar-, Íþrótt- og tómstundaráði Reykjavíkurborgar dags. 14.06.24. með ósk um umsögn á tillögu varðandi breytingu á gjaldskrá sundlauga Reykjavíkurborgar. Sem svar við þeirri ósk samþykkti stjórn FEB að gera bókun fulltrúa FEB í öldungaráði Reykjavíkurborgar sem bókuð var á fundi öldungaráðs nr. 89, fimmtudaginn 20. júní 2024 - að sinni.

Bestu kveðjur
Dýrleif

Dýrleif Guðjónsdóttir
Framkvæmdastjóri



Stangarhyl 4, 110 Reykjavík
Sími: 588 2111

www.feb.is
dyrleif@feb.is